

Socialdemocrats èn pronts per il spurt final

Dieta da la Partida socialdemocratica dal Grischun en il local «Pur» a Cuira

■ (mc) **Cun ina dieta da partida ch'ha gi lieu sonda passada ha la Partida socialdemocratica dal Grischun introduci la fasa finala dal cumbat electoral. La ps grischuna ha approvà unanimamain il palpìri programmatic che porta il titel «Nov start per il Grischun».** A la dieta da partida en il local «Pur» a Cuira han ils socialdemocrats discutà davart ils pass ch'èn necessari per far in nov start en la politica grischuna. Cun la medema chaschun è vegnì orientà davart la campagna da basa cun in'acziun da mobilisaziun al telefon. Sco quai ch'il secretari da partida *Lukas Horrer* ha ditg hajan ins plectentà gia l'emprim di da la campagna 1653 persunas. Radund 150 commembras e commembras da partida sajan involvids en questa campagna per il spurt final. Tut quels sajan persuadids da las qualitads dal candidat per la regenza *Peter Peyer* e dals candidats per il cussegl grond.

Nov start per il Grischun

Il Grischun saja vegnì l'ultim temp sut grond squitsch pervi dal scandal da cartel da construcziun. La reputaziun da la bransch da construcziun saja totalmain donnegiada. Era l'ulteriura economia, l'administraziun e la politica hajan persbler da lur confidenza. Dentant er il chantun pateschia d'in grond donn d'immagine, punctuescha *Horrer*. La responsabladad per quest debachel portan ils impressaris inculpads sco er ils uffizis ed il politichers ch'hajan ignorà las rinfatschas u ch'èn schizunt sez involvids en il cartel. La culpa per questas proceduras e per las prestaziuns resultantas sajan ils

entretschaments tranter parts da l'economia cun l'administraziun e la politica. «Quai sto chalar!», appellescha la Partida socialdemocratica. Sche la politica tschertgia uss la culpa tar il Whistleblower, las medias u la cumissiun da concorrenza saja il donn per il Grischun anc pli grond. Il Grischun stoppia uss tuchegiar il scandal or d'atgna forza e trer las consequenzas necessarias lunderor. En questa examinaziun na dastgian ins betg tolerar mo mesas chaussas. «Il Grischun dovra in nov start politic», punctuescha la dieta da partida.

Tgi che fa cunvegns da pretsch cugliuna

La ps saja s'exprimida cler e net gia al cumenzament: «Tgi che fa cunvegns da pretsch cugliuna. Patruns da fabrica, dentant era fittadins, chantuns e vischnancas ed ils pajataglias sajan vegnida manads en err e cugliunads per milliuns. Perquai dovri uss ina rigurusa inquisiziun e clers scleriments davart ils fatgs e davart las responsabladads persunalas. Sin basa dals resultats da questa examinaziun stoppian ins alura trair las consequenzas giuridicas, persunalas e politicas.

Per sclerir tut ils aspects da quest scandal na tanschian las retschertgas fatgas da la regenza e la procedura penala introducida da la procura publica betg. I dovria plitost ina cumissiun d'inquisiziun parlamentara che sclereschia las dumondas pendentas. Tant la cumissiun da gestiun sco la conferenza dals presidents beneventian questa proposta dals socialdemocrats. I giaja per nagut dapli ed era nagut damain che per la credibilitad da nossas instituziuns. I saja prest ina incumbensa

da Hercules da recuperar la confidenza sclavinada da nossas instituziuns.

Cun novs chaus e novas ideas

Il scleriment pretendì na tanschia dentant betg, ils problems economics restian. I saja impurtant d'emprender dals sbagls chapitads e da far en il medem mu-

ment in pass enavant. Quai possia succeder mo cun novs chaus e cun novas ideas. Cun novas investiziuns per la scolaziun e perfecziun, per la perscrutaziun e per la cultura. L'innovaziun saja la basa per in creschament economic. I dovra dapli spiert da pionier, dapli protecziun dal clima e dapli digitalisaziun per dar dumogn

a las sfidas da l'avegnir. Tenor la ps grischuna dovria plinavant mesiras concretas per stgaffir spazi d'abitar favuraivel e purschidas d'accompagnament per uffants sco era dapli engaschament per la lavur culturala ch'augmenta il bainesser dal Grischun. Quai haja avegnir, quai saja vair progress, punctueschan ils socialdemocrats.

Il palpìri programmatic preschentà na saja «betg cumplet, persunter dentant tant pli concret». Suenten ina curta discussiun e singulas modificaziuns han ils radund 35 preschents a la dieta sanzciunà unanimamain il palpìri preschentà.

Peyer crititgescha Bardill

In grond applaus ha il candidat per la regenza *Peter Peyer* racoltà cur ch'el ha prendì posiziun tar las expectoraziuns da ses concurrent independent *Linard Bardill* che prendia repetidamain sin la corna il departament d'educaziun, cultura ed ambient che vegn dirigi dal socialdemocrat *Martin Jäger*. Tranter auter haja *Bardill* era gi pretendì che era la Partida socialdemocratica saja involvida en il scandal dals cartels da construcziun. «Questa interpretaziun è ridicula», ha ditg *Peyer*. *Bardill* defurmeschia e demonteschia a moda nuncritica tut las instituziuns e tut las partidas. *Bardill* emprovia da promover sia atgna candidatura sin las ruinas dal sistem, quintond uschia recaltgar bleras vuschs. Quai mainia dentant a la letargia politica. I saja uss per ils socialdemocrats ina sfida da pledar «text cler» e da persuader electuras ed electurs che la Partida socialdemocratica saja la vaira alternativa al spectrum burgais.



Il secretari da la Partida socialdemocratica dal Grischun *Lukas Horrer* pretenda in nov cumenzament cun novs chaus en regenza e cussegl grond.

FOTO O. ITEM